

DISSERTATIO MEDICA

INAUGURALIS,

D E

MORBO HYSTHERICO

S I V E

HYPOCHONDRIACO.

Digitized by the Internet Archive
in 2019 with funding from
Wellcome Library

<https://archive.org/details/b30783008>

DISSERTATIO MEDICA

INAUGURALIS,

DE

Morbo Hysterico five Hypochondriaco:

QUAM

ANNUENTE DEO O. M.!

EX AUCTORITATE REVERENDI VIRI

D. GULIELMI WISHART S. T. D. ACAD. EDIN. PRAEF.

NEC NON AMPLISSIMI SENATUS ACADEMICI CONSENSU

ET NOBILISSIMAE FACULTATIS MEDICAE DECRETO

PRO GRADU DOCTORATUS SUMMISQUE IN MEDICINA

HONORIBUS ET PRIVILEGIIS RITE AC LEGITIME

CONSEQUENDIS ERUDITORUM EXAMINI SUMMITTIT

LACHLANUS FRASER SCOTO-BRITANNUS

A. D. III. KAL. JUN. HORA LOCOQUE SOLITIS.

Quamlibet omnis retro antiquitas symptomata illa, affectibus hystericis adnascentia, utero semper vitio verterit, si tamen affectiones hypochondriacas vulgo dictas, cum mulierum hystericarum symptomatis conferamus, vix ovum ovo similis, quam sunt utrobique phaenomena, deprehendemus.

SYDENH. Dissert. epist. ad Guliel. Cole.

EDINBURGI,

APUD T. ET W. RUDDIMANNOS. M.DCC.L.

VIRO PRAESTANTI
D. ALEXANDRO MONRO,

ANATOMES ET CHIRURGIAE APUD EDINENSES

PROFESSORI CELEBERRIMO ;

PRAECEPTORI MEO PIURIMUM COLENDO :

QUI MEDICINAE STUDIOSES JUVENES,

PRAECEPTIS, EXEMPLO, ET AMORE,

ALIT, INSTRUIT, FOVETQUE ;

CUJUS SUB AEDIBUS ATQUE AUSPICIIS

ARTIS MEDICAE ELEMENTA DIDICI :

NECNON,

GEORGIO UDNEY,

MERCATORI LONDINENSI ;

QUI, CUM A NATURA ID HABEAT OPTIMUM,

UT QUAMPLURIMIS PRODESSE VELIT,

MEOS CERTE OMNES MULTIS NOMINIBUS

SIBI DEVINCTISSIMOS TENET :

TENTAMEN HOCCE MEDICUM,

OBSERVANTIAE SUMMAE

GRATIQUE ANIMI

INDICIUM,

OBLATUM VOLUI,

LACHLANUS FRASER.

DISSERTATIO MEDICA

INAUGURALIS,

D E

Morbo Hysterico five Hypochondriaco.

CUI mente sana in corpore sano frui contigit, beatum profecto, quoad res ferunt mortalium, praedicare licet. Ea autem est corporis nostri fors atque conditio, ut ne ullam quidem hujus partem vel minimam, quae doloribus non sit obnoxia, aut medentis ope non egeat, reperire fas sit. Hinc nascitur uberrima malorum seges; quibus tollendis minuendisque ars medica invigilat. Quum vero alia ex his graviora aliis sint, magisque acerba, medici est eorum potissimum causis, quae hominis vitam moerore luctuque obruunt, eruendis amoliendisque, studium suum atque operam locare. Postulante igitur officii nostri ratione, ut doctrinae medicae specimen quaecunque publici juris faciam, de morbo hysterico five hypochondriaco pauca quaedam proferre liceat; nec enim saevior hoc quisquam, aut popularibus nostris infensior, obvenit: quod si errores quidem in ea, quae dicenda sunt, irrepperint, unde medice parum legentibus egisse videar, boni saltem civis partes explere animus est.

MORBUS igitur hicce, in foemellis hysterici, in maribus vero hypochondriaci, nomen obtinens, (etenim unum tantum re vera morbum duplici hoc nomine insigniri plerique omnes, qui hodie sunt, medici consentiunt) duratione longus est; ex eorum scil. numero, quos medici chronicos, five diuturnos, vocant,

Morbi definitio.

A

et

et acutis opponunt; ventriculum plerumque, et primae cocti-
onis sedes, mentem vero, sensusque internos, et quos vocant
spiritus, semper peculiari ritu afficiens, ipsamque vitam, plus
minus, infelicem, prout hoc, vel illo saevierit gradu, reddens.

Origo no-
minis.

Affectus hystericus, vel hysteria, audit ab ὑστέρα *uterus*; in
foeminis enim, uterus medicis antiquis hujus mali sedes habita
est: in maribus vero hypochondriacus; a χόνδρος, *cartilago*, et
particula ὑπὸ, *sub*; quae quidem nominis origo morbum sub
cartilaginibus haerentem denotat. Graece etiam dicitur πνιξ
ὑστερικὴ, quam Latini strangulatum sive suffocationem uteri vo-
cant.

Permuli sane fuere, morbi hujus natalium imperiti, qui ad
aegritudinem potius quandam mentis, quam ad pravum corpo-
ris habitum, referendum esse hoc malum, et per animi tantum
medicinam, quae in imaginatione, judicio et voluntate corrigen-
dis, et in affectibus moderandis consistit, curandum censuerunt.
Rem vero aliter prorsus sese habere, hominumque corpora et-
iam pessime hoc morbo multari, abunde fatis testantur, quos
mala sua novisse aequum est, hystericæ et hypochondriaci. Af-
fectus de quo agimus, cum actiones homini proprias aut omni-
no non exerceri, aut non sine molestia, dolore citaque defati-
gatione peragi sinat, morbus jure merito habendus est. Licet
enim mentis imperium latissime quidem in corpus patere sit fa-
tendum; nemo tamen, me judice, eam esse phantasias lasci-
vientis vim temere credat, quae non modo animum falsis imple-
at terroribus, sed corpus etiam miris penitus modis, et ad instar
omnium fere, quotquot uspiam sunt, morborum plectat.

Morbi
signa.

SYMPTOMATA autem hujus mali ordine, quem res incerta
capiat, enarranda jam deveniunt.

Eo igitur incipiente, gravitatis sensus exercitia vel modica excipit; lassitudines sponte nascuntur et oscitatio; ructus fiunt odore acido vel putri graves; ventriculus et intestina aegri tument et rugitu obmurmurant; ventriculus etiam dolore, multa nausea, vomituque premitur; nunc frigore extrema corporis rigent, nunc ex improvise cutis rubore suffunditur; pedum plantae volaeque manuum calore, praesertim post pastum, aestuant; languescit aeger sudoribus frigidis imbutus; modo astringitur alvus, fit modo fluor hujus nimius; urinæ autem tenuis et aquosae magna vis reddita, hunc morbum, autore Sydenhamo, ab aliis facile secernit; dorsi dolor foeminas laceffit, rarius autem viros; dolor etiam, varius licet semper et mutabilis, anteriorem nunc capitis partem, nunc posteriorem, praesertim vero frontem, ferit; cum autem poenas hisce non absimiles ab adaucto in cerebrum clavo sibi luendas esse fingunt mulieres, clavi hysterici nomen huic dolori, quem vomendi desiderium immane comitatur^a, inditum est. De ligaturis varia corporis membra coarctantibus interdum miseri conqueruntur; muscae, et varia rerum spectacula, oculis obvolitantia, visum perturbant; tinniunt quandoque aures; est ubi stupore et somnolentia obtorpeat, est etiam ubi vigiliis et insomnia torqueatur aeger; larga nonnunquam salivae copia exspuitur; tumoribus oedematosis pedes atque malleoli tenduntur; qui tamen in eo ab hydropicis recedunt, quod mane potius, quam vesperi, intumescant membra, et digiti impressi notam minus diu servant^b; cor saepius, veluti concussum, intremit et palpitat; hanc autem palpitationem dolor circa cartilaginem Xiphoidem aut ventriculi os superius subsequitur. Sentitur pul-
fus

^a Sydenham. dissert. epist. ad G. Col.

^b Sydenham. loc. citat.

sus in sinistro hypochondrio ^a : Tussis, hysterica dicta, nonnunquam, licet oppido rara sit, foeminis molesta oritur. Dolores etiam colicos, iliacos atque nephriticos mentientes, ictero autem, corporis superficiem adinstar croci tingente, soluti, quandoque ingruunt. Corporis externa, dentes nimirum, maxillae, humeri, manus, crura et tibiae interdum dolent ; concitato autem sanguinis motu, cruor ex ore, alvo, renibus naribusque effunditur. Pulsus inter haec tardus plerumque est et exilis ; aliquando tamen subito magnus plenusque evadit.

Si primis hisce morbi stadiis non occurratur, omnia in pejus ruunt ; ore rejicitur materies biliosa, viridi vel nigro etiam colore tineta : affici etiam incipit caput, mentis sedes, quae cum garrulitate, tum iracundia et inquietudine, aut similibus passionibus, metus horrorisque plenis, turbatur. Metus hinc atque desperatio aegros concutit, ac plerumque tanta, ut se mox interituros putent, nullaque ratione in spem erigi et recreari possint ; mens incerta atque inconstans huc illuc temere et sine consilio agitur, adeo ut hoc morbo aegrotantem versiculi Horatiani haud nitide magis, quam vere, depingant :

—*Mente minus validus, quam corpore toto,
Nil audire velim, nil discere, quod levet aegrum ;
Fidis offendar medicis, irascar amicis,
Cur me funesto properent arcere veterno :
Quae nocuere sequar ; fugiam quae profore credam ;
Romæ Tibur amem ventosus, Tibure Romam.*

Mulieres nunc in risum effundi, nunc in lachrymas pariter
inmo-

^a River. prax. med. p. 400. Pitcairn. element. med. physic. mathem. lib. 2. cap. 22.

immodicas solvi, nulla *πρόφασις* manifesta sive illum, sive has
 extorquente, nemini non est notum; abdomen spasmis tenta-
 tur, intumescit aegrae venter; post haec incipit esse difficilis
 spiritus, creber, ac brevis; malum altius in fauces invadens,
 eas quasi vinculo constringere, aut globo, uti loquuntur foemi-
 nae, praeccludere videtur, prorsusque spiritum intercipere, ma-
 gno metu praefocationis. Sopor quidam ac veternus induci-
 tur, genae rubent, frigescentibus extremis corporis, caput fit
 vertiginosum, obmutescit foemina: pulsus interdum obscurus
 parvusque est, ut ne percipi quidem possit. Hisce in ango-
 ribus luctanti aegrae nervi omnes mirum sane in modum disten-
 duntur, nixus quam fortissimos pedibus, manibus, totoque jam
 corpore edit, adeo ut, licet alias mediocrium fuerit virium,
 jam omni adstantium ope retineri vix queat: inter haec, in-
 condita atque inarticulata quaedam vociferat, pectusque ferit.
 Hinc mulier interdum corruens, velut attonita, jacet sine motu,
 sine sensu ullo, respiratione adeo parva et rara, ut nulla esse
 credatur, tanquam ipsa jam mortua extinctaque sit: raro hae-
 miplegia, vel morte, solvitur paroxysmus hystericus; ut pluri-
 mum vero anima inter motus hosce convulsivos leviter aegrae
 deficit, unde paulatim factus est accessionis finis; pulsus est
 validior magisque constat; malae rubescunt; intellectus, sensus
 ac motus restituuntur, corpusque firmari incipit.

Affectus hic gravissimus foeminas magis, quam viros, lacef-
 fit; neque tamen ab insultibus, hystericos omni mala nota ae-
 mulantibus, immunes sunt viri. Nicol. Tulpii observationes
 medicae ^a juvenis patricii historiam nobis exhibent, memora-
 tu haud indignam. Hic ex pube primum doluit, sed converso,

B

post

^a Lib. 1. obs. 9.

post mensem, omni doloris impetu, a pube, versus latus finistrum, ilico male se habuit lien : adeo ut, pressa, vel solo digito, regione lienis, contraherentur subito omnes nervi ; et sequeretur confestim miserabilis universi corporis distentio ; laedens iteratis suis circuitibus, usque eo, mentem jam aliquoties labefactatam, et cum primis vim ipsius imaginatricem, ut crederet se, nescio quem regem ; distribueretque non minus largiter, qualiacunque munera ; imo integras regiones ; ac si revera rerum potitus fuisset. Insidente ipsi hac conceptae majestatis opinione, adeo profunde, ut summe excandesceret, corripereturque nervorum distentionibus, si quis majestatis oblitus, ipsum compellasset nomine usitato. Narrat quoque Frid. Hoffmannus ^a, aegrum suae curae traditum, cui passionis hystericae signa fere omnia, si spasmos excipias, periodicis temporum intervallis aderant. Fidus denique ille morborum observator Sydenhamus ^b memorat aegrum, cui a febre, sanguinis missione, diaeta tenui et pharmaco cathartico saepius exhibito plurimum imminutae essent vires, in tantas solvi lachrymas, quantas vix alias viderat unquam, cum gemitu ac suspiriis tantum non convulsivis.

Affectus hysterici miro quodam consensu, sive aspectu hoc fiat, sive maligno afflatu, in alias atque alias mulierculas immigrare solent : vidimus enim, haud ita pridem, in regio hujus urbis Nosocomio, foeminas, paroxysmis hystericis antea nunquam tentatas, statim, dum alienorum malorum testes adstarent, violenter in hos rapi ; ab hystericarum dein consortio semotas, hisce etiam affectibus liberari.

Tem.

^a Oper. vol. 3. sect. 1. cap. 6. obs. 14.

^b Loc. antea citat.

Tempestate humida et frigida, subito post calidam siccamque ingruente, instante plenilunio, aut catameniorum periodis, praesertim si uterus solenniter, uti par est, non purgetur; aut denique ratione victus perperam instituta, hic affectus, (quem melancholiam demum, morbum comitalem, apoplexiam, hydropem, phthisin, aut etiam mortem, si diu permanserit, induxisse animadversum est) pessime exacerbatur et recrudescit.

Recensuimus, ni fallor, praecipua hujus morbi signa; quod si nonnulla aut penitus omissa, aut lucido parum ordine prolata, videantur; veniam me, qui Sydenhamum ipsum causam meam orantem habeam, apud lectores impetraturum confido. “Dies enim” inquit ille “me deficeret, si omnia, quae affectus hystericos gravant, symptomata annumerare velim, tam diversa atque plane contraria specie variantia, quam nec Proteus lusit unquam, nec coloratus spectatur chamaeleon; neque tantum multifaria sunt illa, sed nec regula aliqua aut typo uniformi se contineri patiuntur, quod in aliis tamen affectibus usu venit, sed farrago sunt quaedam *φαινομένων* incomposita atque inordinata, unde perarduum est hujus morbi historiam describere.”

Morbi historiae cadaverum quorundam sectiones, ut ratio hujus melius patefcat, subnectere alienum non videtur.

DICIT autem Willisius ^a, se mesenterii laminas a se invicem divulsas, illaesis interim aliis visceribus atque utero, in foeminis, hoc morbo extinctis, invenisse; nonnullas autem mulieres, affectibus hystericis subinde, dum ex aliis morbis aegrotarent, petitas, nervos, jam jam in occipite nascentes, fero acri penitus

Cadaverum sectiones.

^a Patholog. cereb. cap. 6.

tus demersos post mortem exhibuisse; utero se recte satis habente.

Puellae, passione hysterica mortuae, uterus atque omnia viscera, si fidem habeamus D. De Graafio, ^a sana inerant; huic autem cordis thalami coacto sanguine oppleti sunt.

Aperto foeminae nobilis cadavere, nil mali, praeter calculum, renum alteri inhaerentem, repertum est: haec tamen, dum in vivis esset, magnis suffocationibus, languoribus frequentibus miseram prorsus, uti nos docet D. Mauriceau ^b, vitam traduxit.

Bonetus ^c, in sepulchreto suo anatomico, hystericarum, quibus uterus fuit incolumis, sectionibus bene multis historiam medicam ditavit. Aliis vero uterum et ovaria schirro, atque id genus tumoribus, aut materie quadam aliena referta, induisse, idem Bonetus etiam auctor est.

Hypochondriacorum mala haud frequentius a liene, quam hystericarum ab utero, pendere; viris autem, aequae ac foeminis, viscera quaedam schirro obsideri, sano saepe his utero, ut et illis liene, luculenter satis evicit Boneti sepulchretum anatomicum jam laudatum.

Hypochondriacorum cadavera amplius quinquaginta Sylvius rimatus est; his tamen omnibus lien integer fuit ^d. Licet igitur splenem nonnullis aegris intumuisse, fidem fecerit autopsia ^e; hunc tamen morbum a splene ineptius utcunque nomen sortitum esse, observata medica abunde probant. Cheyneius ^f vero,

^a De succ. pancreatic. cap. 9.

^b Liv. 3. cap. 21. vol. 1. Maladies des femmes grosses.

^c Tom. 3. lib. 3. cap. 33.

^d Olaus Borrich. apud Th. Barthol. cent. 3. Epist. 97. Highmor. de morb. Hyp. Littré histoire, de l'acad. 1700. obs. 7.

^e Bonet. loc. citat.

^f English Malady.

ro, (testis locuples fane et idoneus, si quis alius, in hac re) quaedam ex aegrorum visceribus, schirro aliisque tumoribus obstrui vel laedi perhibet. Mesenterii quandoque venae turgidae sunt et varicosae g. Mira autem res est, nulla quandoque tanti mali vestigia omnino manere.

DE hujus morbi natura causisque proximis magnae lites auctoribus moventur. Uterum vero exinanitum et resiccatum ex appetitu humidi sursum, hepar versus, intra abdomen se trudere voluit Hippocrates a. Galenus b, contra, uterum a liquorum vel vaporum copia nimia sursum intendi statuit. Fuisse autem qui ab humore, nescio quem, venenato, Thessalis carminibus, vel fascinanti oculo, natum hunc esse morbum reputarunt. Hae quidem opiniones, falsae admodum et erroneae, medicis plerisque omnibus, ante inventum ab immortali Harveio sanguinis circuitum, satis arriserunt. Exinde vero, cum anatomia feliciter excoli coeperit, vana haec et commentitia minus placebant. Willisius cerebri nervorumque anatomen diligentissime primus excoluit, et organorum horum officia quoque et functiones non minori industria, aut ingenii acumine, erudire tentavit: morbis dein, qui cerebrum et nervos imprimis occupant, dogmaticae, quod aiunt, explicandis, et congruenter doctrinae Harveianae, operam dare non gravatus est. Quamquam vero multa in hisce rebus, fertili et luxurianti quo praeditus erat ingenio, subtilius quam verius fuerit commentatus; plerisque tamen medicos, qui post eum scripsere, sententiae suae de morbi hysterici et hypochondriaci natura, et pri-

Causae hujus morbi, proximae dictae.

C

ma-

g Guarinon. conf. 484. Lud. Mercat. tom: 3: lib: 1: cap: 17:

a Morb: mulier. lib. i. sect. 5: p: 592.

b Lib. 6. de loc. affect.

maria fede, adfentientes habuit. Inter quos non parum autoritatis eidem conciliavit magnus Sydenhamus. Willifius autem statuit morbi hyfterici et hypochondriaci unam eandemque naturam et rationem effe, unamque fedem primariam; videlicet cerebrum et nervos inde oriundos: falfo autem incufari in mulieribus uterum, in viris lienem, ventriculum, vel viscus aliud quodvis, tanquam horum malorum praecipuas officinas, et domicilia; eaque, cum afficiuntur, fecundario tantum et symptomatice laborare.

In hanc Willifii fententiam, rationum, uti mihi videtur, momentis innixam, confirmatamque fectionibus cadaverum jam memoratis, quidni eamus? Viscera certe laefa et fchirris obfita, quae morbi faepius effectus potius quam caufae videantur, ab hac fententia dimovere nos non debent. Quod fi viscera, ante omnia vero ventriculus, tumoribus vel alia quavis ratione laefa, huic malo anſam praebuiſſe ſit fatendum, non ideo tamen falſa ſint quae diximus neceſſe eſt; nervis enim male affectis, cibi rite digeri et coqui nequeunt; cibus autem e contrario, vitio inteſtinorum, male ſubactis, ſpiritus animales pravi forſan ſecernantur; unde vaſorum tenera laxaque compages, et exquiſita nervorum mobilitas. Utcunque vero ſeſe habeat neceſſitudo illa, ſive commercium, quod nervos inter atque viscera intercedit, corpora infirma in ſpaſmos omnesque nervorum affectus agi quam facillime, quotidiano uſu compertum eſt. Hinc teneri infantuli, quibus dentes erupturi ſunt, aut febris, variolas praegreſſa, iſtat; hinc etiam aegri omnes, quorum vires morbis diuturnis, evacuatione nimia, aut quarumcunque rerum nonnaturalium abuſu franguntur, nervis levi quavis de cauſa irritandis et diſtendendis dolent. Remedia denique huic malo

malo apposita, quae scilicet corpus roborant firmantque, a debilitate ortum satis probant.

CAUSAE REMOTAE NUMERANTUR.

1. Nascendi conditio.—Lienosos enim ex lienosis gigni notavit olim Hippocrates ^a. Ea est quibusdam pueris nervorum viscerumque debilitas, veluti ex traduce accepta, ut ad hunc morbum nati pene factique videantur.

Causae remotae.

2. Sexus sequacior.—Foeminae, humani generis conservatrices a natura destinatae, huic morbo, ex delicatulo magis rariorique corporis habitu, qui vitae molliori conveniat, maxime obnoxiae fiuntur. Huc etiam accedunt laxitatis debilitatisque causae, quae praeter naturam his fiunt; mensium volo lochiorumque suppressionem morbosam: neque vero iniqua adeo natura utuntur, quin de industria quasi, prava nimirum vitae victusque ratione, hoc sibi malum frequentius arcessant, quam acceptum referant naturae; quae enim, laboribus assuetae, duriter vitam agunt, ab omni plerumque horum affectuum specie liberae sunt.

3. Aër humidus tepensque.—Hinc enim mollescent et relaxantur fibrae, uti aiunt, motrices; omnesque morbi ab e-languido fractoque nervorum tono oriundi, vel nascendi hinc occasionem vel incrementum capiunt. Frigus etiam penetrabile, quum corporis vasa stringat nimis et humores cogat, hoc affectu laborantibus malum est; sanguis enim canaliculis exilibus moveri hinc nequit; unde fiunt spasmi et corporis extremorum frigus: occlusis vero cutis spiraculis, acres putridaeque sanguinis particulae, quas foras ejici oportuit, retentae, ven-

tris

^a Lib. de morbis sacris.

tris tormina excitant. Aestate igitur hystericae et hypochondriaci rectius plerumque se habent quam hyeme et autumno. Hisce etiam malis opportuniores sunt, qui terrae plagas septentrionales incolunt, quam qui coelo miti et placido fruuntur.

4. Cibi crassi, viscidi, inertes, aëre foeti; quales sunt cuncta fere legumina, fructus fugaces, acetaria, &c.— Frisios, tali victu utentes, hoc morbo saepissime dolere scribit Blancardus ^a. Haec quidem duris messorum iliis impune subiguntur; carnes autem animalium hominibus, literis otioque deditis, crassae, durae et coctu difficiles evadunt. Vinum quoque et liquores, ardentes dicti, sine modo ingurgitati, ventriculi vigorem minuunt ciborumque cocturam turbant; hinc Angli, quibus Bacchi munera cordi nimis sunt, hoc morbo pessime vexati, nomen ei dederunt. Infusa etiam theae et coffeae, quae multi ex nostratibus, tam viri quam foeminae, usque et usque pitissant, ventriculum humido tepore pessundant obruuntque.

5. Vita otiosa domique acta.— Corporis motus sive exercitia, ciborum coctionem juvant; sanguini, adeoque reliquis etiam humoribus, motum, fluorem, caloremque debitum conciliant: haec corpori atque etiam animo amica sunt; contraria autem omnino his sunt, quae quies nimia efficit; viri quippe, literis operam navantes, uni fere semper sedi immorantur, chartisque impallescent; nec longa est mora, quin hypochondriaci evadant; animum enim dum strenue exercent, corpus, deficiente motu, hebes fit et imbecillum.

6. Affectus animi, timor scil. et cupido, ira, moeror, gaudium.— Hi enim, dum mentem ex imo movent, corpus quoque

^a P. 2. prax. cap. 61.

que variis modis afficiunt. Hinc appetitus dejicitur, et ventriculi vires nullae pene sunt; funesta hinc tabe homo depascitur; animi autem aegritudines quam citissime in corpus transire, in eo maxime, monente Sydenhamo, cernitur; quod, ingruente ira, ingens limpidissimae urinae copia extemplo profluat.

7. Infomnia longa, sive vigiliae.— De natura somni diu multumque medicis disceptatum est, de usu vero satis convenit. Motu corporis, vel studio mentis acri, spiritus animales quasi diffantur et in auras avolant; his deficientibus, corporis humorum interturbatur coctio atque secretio; e succis autem crudis et male coctis hic morbus exoritur.

8. Uteri purgatio aut haemorrhoeis nimia^a, pauca, vel nulla.— Sanguis menstruus, utero congestus et retentus, aut semen, nescio quod, corruptum, Hoffmano aliisque plurimis scriptoribus, sola in foeminis hujus morbi causa habetur; male quidem: nec enim viris nuptas, quibus rite fluxerunt catamenia, hoc morbo immunes extitisse omnes^b; aut quibus viri consuetudine caruisse religioni fuit, eodem semper tentatas esse, ^c verum est.

Sanguis, qui utero efferri debuit, retentus, omnia corporis vasa distendens et comprimens, vires aegrarum sua mole, vel labe, perdit. Nimio autem hac via effuso sanguine, pereunt itidem vires, adeo ut eadem utrobique debilitatis ratio subsit.

Notandum vero est, sanguinis fluxum e sinu muliebri nunquam hystericis fieri quam effusissimum; qui tamen fluxus, effectus vel symptoma hujus morbi censendus est^d.

D

Affectus

^a Hoffman. loc. citat. obs. xi.

^b Ibidem.

^c Mauriceau maladies des femmes grosses, loc. citat.

^d Hoffman. loc. citat.

Affectus hystericus a fluore albo, acri et maligno, vel a mola, quae pure jam solvi coeperit, uteri cavum occupante, ortus est ^a.

Mulieres quae a partu haud commode purgantur, affectibus hystericis vel saevissimis corripitur quandoque solent ^b; quod malum iisdem, si frigus ad imum ventrem suscipiant, aut etiam praemature, hoc est, paucis a partu diebus, surgant, et sese a lecto aliquamdiu abstineant, evenit. A partu quoque nimis purgari quasdam mulieres, in hos affectus praecipites dedit ^c; cuius quidem rei ratio satis est in promptu.

9. Vires aegri a morbis, sive acutis, sive diuturnis, fractae multum et detritae, vel etiam *ἰδιοσυγκράσια*, aut peculiaris corporis habitus.— De viribus naturae vel morborum vitio infirmis, tanquam causae horum affectuum, plura dicere non opus est: quod si vires satis constiterint, hisce malis, nisi peculiaris corporis temperies a natura alicui data fuerit, locus esse vix potest.

ἰδιοσυγκράσιων sane, non aliter quam remediorum specificorum, ratio, multam habet atque ancipitem disceptationem, ne dicam futilem: cibos quosdam vel medicamenta, quae sapore dulci vel odore aliis placent, gravia fieri aliis et ingrata, omnes norunt. Inde vero factum utcunque videtur, quod nonnullae foeminae ab iis, quae dulcia sunt, vel multo odore fumant, in paroxysmos hystericos concitentur ^d.

Ratio symptomatum.

Gravitatis sensus, quem veluti sponte nasci, vel leves corporis motus excipere posuimus, oriri ab inopia spirituum animalium

^a Mauriceau, loc. citat.

^b Sydenham. loc. citat.

^c Frid. Hoffman. loc. citat.

^d River. loc. citat.

malium, vel ab humorum crassi viscida et inerti, videtur. Causae, unde moventur corpora nostra, abditae quidem prorsus sunt aut obscurae; motum vero corporis omnem vel a spiritibus animalibus, vel ab humoribus in vasa agentibus, pendere verisimile est: his igitur naturam alienam, crassam, pigramque sortitis, vel deficientibus illis, cerebrum inerti mole prematur, corpusque ad motus quoscunque prompte peragendos ineptum reddatur, necesse est.

Ventriculum hoc morbo male affici, haud est cur jure miremur: hic enim nervis quam plurimis instructus, cibos omne genus capit; huic modo carnes animalium ingeruntur; modo legumina vel fructus horarii; nunc frigidis et calidis plus aequo riget vel exaestuat; nunc liquoribus acidis vel ardentibus stupebit et obtunditur: eo autem insaniae crapula quorundam atque ingluvies pervenerunt, ut esculentorum potulentorumque tantum non omnia simul ingurgitentur. Delirante igitur homine, ventriculus plectitur: copia enim alimentorum ad crepaturam fere turget; humentibus, aquosis tepidisque languet et prosternitur. Cibi nimii, vel indole sua multum discrepantes, ventriculo ingesti, vires hujus obruunt; coqui igitur, vel e corpore pelli, recte nequeunt; quin obturato potius ventriculi cavo immorantes, in naturam quique suam, sive acidam sive putridam, sponte faceffunt: ventriculus, fibris ejus irritatis, et in spasmos actis, dolet; nausea etiam et vomitiones a mucoviscido, vel ab ingestis nimis, acribus et flatuosis, stomachum gravi onere aut stimulo laceffentibus, moventur; ructus autem acidi vel nidorosi fiunt ab aëre, qui cibis olim delituerat, a calore vinculis suis jam soluto, atque per ventriculi os superius viam expediente. Neque rugitus, quo abdominis viscera tenduntur et perstrepunt, ab hac multum diversa est ratio: aër quippe

quippe, e cibis calore excussus, ventriculi molem sensim sensimque rarefciendo adauget; nervis vero (cum diuturna esse nequeunt, quae summa sunt,) ab hac ipsa distentione quasi resolutis, aër, qua porta datur, effunditur; ore igitur aut ructu, uti dictum jam est, fertur, vel deorsum ad intestina quandoque delatus, spasmis crebris, vi magna atque murmure iterum iterumque superandis, intercluditur.

Gravitatis corporis fida ac perpetua fere comes est oscitatio; hinc enim, aëre in pectoris sinum uberius hausto, diaphragma, quod ventriculus, aëre tumidus, loco suo moverat, deorsum abdomen versus deprimitur: ampliato igitur thoracis cavo, pigri crassique humores, qui pulmonum ambagibus haeserant, ab aucti aëris pondere, tanquam a praelo, soluti, per omnia corporis loca melius disperguntur.

Corporis extrema, procul a corde, caloris fonte, dissitata, ob fluidorum motum tardiozem, undecunque demum is sit, frigore prae ceteris locis torpeant, necesse est. Rubor autem cutis, atque calor derepente, praesertim a pastu, orti, fiunt vel a stimulo quodam corpori extrinsecus nato, ab animi affectu graviori, vel a novis succis sanguini investitis: hinc enim sanguis, incitato ejus motu, vel aucta copia, in vasa non sua pellitur; ab errore scil. locorum, quae rubrae sunt hujus partes in vasa, a natura sero vel lymphae trajiciendae dicata, feruntur.

Thoracis angustia, spiritus difficilis, animi deliquium, syncope, et cordis palpitatio fiunt a ventriculo et tubo intestinali aëre, qui ob spasmos sursum vel deorsum urgeri nequit, distentis: hinc enim septum transversum, cum et ipsum moveri jam fere nescit, pulmoni appressum, hujus motum minuit; hinc etiam, occlusis imi ventris vasis, uberior sanguinis copia pulmoni cordique immoratur: summis igitur angustis premitur
aeger,

aeger, dum gravissimum hoc onus, neque a pulmone, neque a corde oppresso, amoveri possit. Motus interea corporis, unde plus sanguinis cordi appellitur, acerbiora haec mala reddit. A distentione, in nervos cordis vel pulmonis traducta, cordis auriculæ et thalami, binæ huic appensæ arteriæ majores, et ipse pulmo, spasms nonnunquam convelluntur; hinc ergo eandem tragoediam excitari posse, nemo non videt.

Vehementes cordis palpitationes comitatur dolor ad cartilaginem Xiphoeidem; quoniam nervus phrenicus, qui ad sinistram est, his cordis motibus subjicitur.

Alvus duobus potissimum de causis adstringitur; vel scil. ab intestinorum motu debili, vel ab humoribus coctioni alimentorum inservituris, obstructo hepate, splene aut alio quopiam viscere, vel infirmis aegri viribus, depravatis. Contra, vero eadem profluit, quando spasmi, ab acri materia excitati, liquores intestinorum irritando emunxerint.

Foeminis, quibus, menstruis cohibitis, sanguine uterus distenditur, dorsi dolor a consensu, qui uteri nervis et lumborum fit, oritur; viris autem idem illud accidit, ab intestino duodeno, eo loci quo cum dorsi spina committitur, flatibus præter modum turgido.

Ab incitato sanguinis circuitu, vel a spasms cerebrum nervosque laceissentibus, caput dolet. Qui vero dolor, sedem suam subinde mutans, clavus hystericus vocatur, irritationem quinti nervorum paris, quod fronti impenditur, cum colli primo communicatam, pro causa habet.

Vasa encephali, sanguine nimio turgescencia, cerebrum nervosque hinc ortos comprimunt. Spiritus igitur animales secerni recte nequeunt; deficientibus vero his, aut somnus levior obrepere, aut etiam veternus fieri, possit.

E

A spasms

A spasmodicis et vellicatione nervorum, aegri noctes diesque infomnes saepe agunt. Inde autem somnus maxime arcetur, si mens alicui vano metu atque terrore exagitetur: hinc etiam lurida amicorum spectra ante oculos discurrunt, aliaeque terrent inter somnia imagines turbidae.

Levia rerum simulacra, ante oculos volitantia, a spasmodicis, oculi retinam leniter corripientibus, unde visus axis nunquam fere non mutatur, oriri posse probabile est.

Infirmis aegris tuba, Eustachii dicta, quae ad aurem a palato ducit, debilis facta et tanquam resoluta, aëri, ore hausto vel reddito, patulum magis iter praebet; hic vero spatia ampliora, dum calore expanditur, occupans, membranam tympani mollem laxamque undique pulsant; hinc variae soni imagines, ut ita dicam, auri exhibentur, mentemque turbant. Quod idem a spasmodicis, arterias quae membranam tympani percurrunt occupantibus, incidere etiam potest.

Quibus hoc morbo perierunt vires, magnam salivae tenuis copiam quandoque exspuunt, perinde ac si unguento ex mercurio illiti essent: cuius sane laticis profluentis ratio a sanguinis crasi soluta, et a secretionibus, quas per cutem et per alvum fieri oportuit, cohibitis, petenda mihi videtur.

Urina his aegris, instar aquae, tenuis est et pallida; quoniam sal atque oleum, quae hominum recte valentium et exercitatorum urinae solent inesse, huic, propter motus corporis segniores, et debiliorem vasorum in sanguinem vim actionemque, minus suppetunt; quod si penitus non defuerint, spasmo tamen, uti saepius evenit, constrictis renum vasis, quod urinae aqueum est, retento sale et oleo, tantum demittitur.

Dolor eum, qui intestinorum coli vel ilei esse consuevit, aemulans, ut et qui pedes, dentes, humeros aliasque partes occupat

cupat, a vasorum strangulatu, qui spasmis debetur, ortus censendus est: hinc constricta splenis arteria, pulsus hypochondrii sinistri sentitur: hinc etiam utcunque omnium arteriarum ictus parvi fiunt et debiles, qui, spasmis, harum tunicas antea convellente, laxato, fortiores evadunt atque majores. Cum autem pulsus his aegris nunc satis validus sit, nec mora, quin deficiat omnino, aut multum concidat; a sanguine, qui calore et frigore plus satis diffunditur aut comprimitur, hujus forsan ratio pendeat: hinc enim mala omnia, quae sanguinis vel inopia vel abundantia nimia secum affert, facile nascuntur.

Corporis nostri humoribus rarescendi vis quaedam inest; quae, uti a Cucurbitis patet, vasorum vires, quibus eadem contra hos nituntur, longe exsuperat: neque profecto aëris, nos undique ambientis, pondus, humorum rarefactionem satis cohibet, nisi ad hoc etiam vires vasorum integrae accesserint. Aegri itaque hoc affectu laborantes, cum vasorum vires imminutas saepe habent, pulsum mollem, at pleniorum, hinc quoque habent.

Oscula vasorum oris, narium vel renum laxata, cruorem tenuem, ad motum vel levissimum, aut ob spasmos derepente ortos, effundere minime mirum est.

Dolente corpore, mentem etiam una dolere, vulgus, aequae ac medici, norunt. Morbo aliquo gravi, undecunque is demum fuerit, corpori minitante, mens simul aegrotat; levato autem hoc, protinus ad se redit mens. Quum vero animi nexus cum corpore in totum pene nos latet, levitas illius et inconstantia, unde falso pariter gaudio atque terrore refici modo aegros, modo subrui prorsus videmus, ad inordinatos quosdam spirituum animalium motus, a corporis intemperie, aut pravo habitu pendentes, me iudice, referenda sunt. Tacenda

cenda autem mihi haec potius veniunt, ne faciam intelligendo, quod nihil intelligam : reliquorum igitur, quae memora-
vimus hujus morbi, phaenomenôn rationes inire jam liceat.

Experiundo novimus, bilem liquoribus acidis admistam, aut
impensius hinc virescere, aut colore etiam nigro foedari ^a.
Quidni itaque aegris hisce, ante alios vero quibus herbarum
fructuumque plurimum assumitur, vomitus praeius, lividus,
vel niger accidat ?

Morbi paroxysmus ab acri quopiam, ventriculum et intesti-
na irritante, vel ab aëre distendente, saepius excitatur. Hinc
enim totius corporis nervi, propter mirum illum, quo simul
dolent et tristantur, consensum, spasms motibusque tremulis
et convulsivis torquentur.

Uterum, e sua sede dimotum, instar globi cujusdam, in ven-
triculum efferri antiqui medici voluerunt ; huic etiam sen-
tentiae, quam a tactu compertam exploratamque se habe-
re scribit, suffragatus est Fernelius ^b. Praecordiorum ergo
dolorem omnem, et spirandi difficultatem, quam nos globum
hystericum dicimus, pro strangulatu, ab utero ascendente fa-
cto, habuerunt. Haec tamen vera esse nequeunt ; uterus e-
nim, (ut taceam, id quod notissimum est, viros hoc globo non-
nunquam premi,) pectinis ossibus, ope scil. ligamentorum,
firmiter adnexus, e suo loco moveri non potest : foeminae au-
tem, passione hystERICA extinctae, uterum incolumem, locum-
que, quem natura voluit, tenentem, exhibuerunt. Ab aëre
itaque extenuato, dum per gulam vi summa exire nititur,
spasms coërcito, globum hystericum oriri, sane artis theoriae
magis consentaneum est. Hinc enim arteria aspera, gulae ad-
cumbens

^a Huxam. de morb. col. Damnon. p. 19. &c. Baglii. oper. p. 436. et seq.

^b Patholog. lib. vi. cap. 16.

cumbens, non solum angustatur, sed et nervi glottidis a pari octavo, unde etiam gulae nervi, orti, in spasmos una cum his deducuntur. Miserrimis aegris, his malis aliquamdiu obrutis, anima deficit; inde vero spasmi solvuntur, et, reclusa spiritus via, accessionis finis factus est.

Aër, e ventriculo in gulam pulsus, aortam descendentem, quae huic subjacet, comprimit; hinc autem sanguine uberiori vasa capitis turgent, fit sopor et vertigo, alique morbi ab encephalo praegravato nati.

Paroxysmi hysterici foeminas quasdam solenniter omni mense, instante plenilunio, invadunt; recurrunt autem ordine hoc constanti a luna, uti medicis nonnullis visum est, aërem, vi sua attrahendi, leviolem ac proinde magis humidam, efficienle.

Morbo jam inveterascente, sanguis humoribus crudis et serosis lentescit; hinc autem morbus attonitus, comitialis, vel resolutio nervorum, aegris incumbit. Multi denique, dum corpus succis male coctis non alitur, hydrope aut extinguuntur, vel marcore paulatim consumuntur.

DIUTURNUS esse solet hic morbus; raro autem lethalis. Prognosis
Ea igitur est natura, ut metus plus quam periculi ostendet. Quod aliis plerisque morbis usu venit, huic quoque accidit; eo scil. magis acerbescit, quo diutius et frequentius aegro aliqui infederit, aut plures ex iis corporis partibus, quas sanas esse permultum hominis interest, occupaverit. Sanitatem his medicina vix promittit; quid enim? oblatam eo usque respuunt, ut, cum in una mentis levitate consistunt, neque ciborum, neque remediorum, quae medicus suadet, sat longo usui velint insistere.

F

Habet

Habet autem hic morbus commoditates quasdam, unde incommoda sua minui saltem videantur.

Hystericae et hypochondriaci fibras laxas atque debiles, succos crudos et ad motum ineptiores, adeoque calorem corporis minorem, quam fani, habent; hos ergo morbi acuti aut non omnino, aut non nisi graviore de causa, adoriuntur; huc spectat illud Hippocratis ^a, “ Qui acidum eructant, non admodum morbo laterali tentantur.” A febre autem, forte fortuna, detenti, facile, et cum magno suo bono, emergunt; febris enim, diuturni exercitii vice fungens, cerebrum nervosque firmat, et vasa obstructa saepius referat; unde morbus prior a febre tollitur, aut multum certe levatur. Febres igitur, eas praesertim quae ex intermittentium numero sunt, in hos aegros cadentes, alere potius et sustinere, quoad vires ferant, quam cito nimis fugare, boni medici est.

Senectus porro, quae morbus plerumque et ipsa habetur, hoc affectu laborantibus, monente Cheyneio, pro fanitate est: senectutis enim cum sit corporis succos depascere, multaque vasa exilia, compingendo quasi, delere, robur firmitatemque his aegris eadem conciliabit.

AFFECTUS hujus sanatio omnis in eo posita videtur, scil. ut,
Primo, Medenti cautum sit, ne incrementum morbus capiat.

Secundo, Humores crudi, ventriculo et intestinis stabulantes, eluantur; reliqui vero debito fluore gaudeant.

Tertio, Symptomata graviora mitescant.

Quarto, Corpus aegri firmetur.

Morbi

^a Aph. 33. sect. vi.

Morbi causae, quas pene omnes recensuimus, evitandae sunt aegro; manentibus enim his, morbus non potest non manere, aut vires etiam non acquirere. Quod si aër humidus, frigidus et nebulosus in culpa fuerit, hic cum eo, qui tepore blando et modica siccitate profit, mutandus est. Urbes, magna hominum frequentia celebres, his aegris inutiles prorsus sunt; aërem quippe fumo atque vaporibus densum inquinatumque habent; rus autem aër purus et tenuis plurimum commendat. Rure igitur degentes aegri coelo liberiore fruuntur: qui enim tempestatum vicissitudines provide nimis fugit, is profecto hoc mali sibi arcessit, ut his vel levissimis graviter laedatur.

Quod ad cibos potionesque attinet, modicus horum usus convenit quam maxime; dictum enim est, cum de morbi causis egimus, a crapula et ingluvie hunc saepius oriri. Eam igitur alimentorum copiam, quam ventriculus facile subigat et coquat, sumere licet; quod ultra ingeritur, autore Hippocrate^a, nocet: “Attenuata longo temporis intervallo corpora, lente reficere oportet; impura enim corpora, quo plus nutrias, eo magis laedas.”

Multum quoque interest, quo victus genere aeger utatur. Alimenta enim crassa, viscida, acria et pingua vitanda sunt: quae vero blanda, levia et coctu sunt facilliora, in usum adhibeantur; qualia sunt, panis ex puro optimoque tritico confectus: oleraria, tenera et igne cocta; spinachia, lactuca, cichoreum, scorzonera: carnes albae et molles juniorum animalium; agnorum scil. vitulorum, et pullorum gallinae: ex piscibus, aselli, troctae, astaci. Nulla denique ciborum varietate sollicitandus aeger est; ne plus assumat, quam concoquat.

Diaeta

^a Sect: 2: Aph. x: et 7;

Diaeta illa, quae in lacte tota est, Sydenhamo adversus colicam hystericam praecipue laudata, Cheyneio vero per omne morbi stadium decantatissima, permultis aegris, ob lactis indolem crassam et ventosam, obfutura mihi videtur. Quibus enim lac, in ventriculum haustum, acescit et cogitur, maxime nocet; his autem lac asininum, vel tenue lactis vaccini serum, utile esse possit. Spiritus etiam cornu cervi, vel liquoris cusuvis alcalini guttulae aliquot recenti lacti affusae, quo minus assumptum hoc coëat, efficiunt.

Quod ad potum, his aegris commodum, attinet, optimus est aqua pura et levis, quae alimenta probe diluit; languidis vero admodum et infirmis vinum, aqua multa temperatum, atque etiam subinde vini meracioris haustus, concedendum est. Hujus tamen largior et quotidianus usus, qui ventriculi fibras adurit, et sanguinem multo igne exsiccat, procul exulet.

Haec quidem de diaeta perpetua pene sunt; corporum tamen genera et duratio morbi observationes quasdam desiderant: neque enim mutationes subitae periculo carent; neque morbo incipiente, adeo ad amissim omnia exigere, ac quando idem jam adoleverit, oportet.

Ad primam autem hanc curationem absolvendam corporis etiam exercitatio adhibenda est, quae semper antecedere cibum debet; pleno enim ventriculo chylus adhuc crudus in venas lacteas pellitur. Exercitationis autem finis esse debet sudor, aut certe lassitudo, quae citra defatigationem fit: quod enim magis est, vires frangit. Quum vero id exercitii genus, cujus impetus fere omnis in ventrem inferiorem fiat, his affectibus optime medetur, diu multumque singulis diebus equo vehi commodissimum est. Hinc enim grato labore, et sine ullo virium dispendio, omnes corporis partes agitantur, ante alias autem abdomi-

dominis viscera, quae ex situ, quem obtinent, pendulo et fluitanti, ad succussionum numerum hinc inde perpetuo moventur. Materies ergo vasa obstruens, aucta horum in fluida actione, resolvitur, humoresque corporis omnes debitum florem atque naturam induunt. Corpore autem sub divo et in amoeno rure exercitato, excitatur atque reficitur animus; quem curis, sollicitudine, omnique pathemate graviori, vacuum, dulcibus amicorum colloquiis, nullaque non, qua fieri id tandem potest, ratione, deliniri debere, medici fatentur.

II. MENSTRUIS aut haemorrhoidae praeter modum praeterque aetatem retentis, sanguinis nimii, vasorum vires facile superantis, signa plerumque adsunt. Aegris itaque hoc affectu, ob menstrua nimium cohibita, laborantibus, sanguis sub iisdem fere mensium diebus, quibus ferri haec debent, mittendus est: hinc enim detracto, quod sanguinis supervacuum est, curationem secundam optimo cum successu inchoare licet. Quibus autem menstrua nimium profluentia, aut vires multum detritae, affectus hujus causa extiterunt, his venam secare noxam pessimam adlaturum est.

Rarius equidem corpori infirmo missione sanguinis opus est. Remedia autem, unde humores crudi et pituita lenti, ventriculum et intestina occupantes, per os redduntur, vel subducuntur per alvum, eximios praestant usus. Infusa itaque tepida cardui benedicti, florum chamaemeli, plantarum alcalescantium; rad. scil. raphan. rustican. sem. sinap. aut pulvis rad. ipecacuan. cui nonnunquam, ubi validius postulant duriora corpora, tartari emetici granum unum aut alterum adjicitur, pro emeticis exhibentur. Alvus vero medicamentis, roborantibus dictis, qualia sunt rad. rhei, succus aloës, leniter ducenda est;

G

fortiora

fortiora his raro, nec nisi magna mucī copia intestina gravante, in usum revocare expedit; neque enim aegri haec facile aut impune ferunt. Saepius, prout res nata fuerit, praesertim vero quando alvus diu nimis astringitur, propinari debent haec remedia, tam cathartica, quam emetica: turbae autem hinc, inter operandum, excitatae, opiatīs hora somni exhibitis, componantur.

Notandum est, quod emeticorum usus non solum in humoribus educendis ponitur; corpus enim quam validissime, duri ad instar laboris, commovet, vasorum omnium vim atque elaterem adauget; quos igitur humores pravos e corpore non evocat, subigit et comminuit: hinc remediis, liquores crudos et male coctos resolvendi virtute praeditis, quibus proxime erit locus, viam sternit optimam et facillimam. Horum autem in censum multa veniunt, quae stimulo, quem ventriculo et intestinis incutiunt, atque etiam putido odore, metam optatam attingunt. Hujusmodi sunt gummi resinosa; assa foetida, galbanum, ammoniacum, myrrha, sagapenum, &c. saponēs arte facti; sapo Venetus, ossa Helmontiana: sales neutri; tartarus regeneratus, tartarus tartarizatus, &c. fuligo; remedia etiam, quae a nervis nomen habent; castoreum scil. succinum, &c. hujus quidem olei guttulae iii. vel iv. aquae aurantior. infusae, paroxysmos hystericos cito solvunt, monente Riverio. In hunc autem usum medicamenta acria, ex mercurio et antimonio parata, multum a nonnullis practicis laudantur: quae tamen non, nisi cum grano salis, uti aiunt, adhibenda sunt; experiri enim prius decet quinam sint effectus gummi prius recensitorum; haec quoniam dum humores solvunt, vasa corporis firmant. Mercurius equidem viscida omnia potenter satis domat et incidit; corporis vero robur plus minus deterit: per-
pauci

pauci autem aegri dantur, qui antimonii et mercurii vim effera sine noxa ferunt. Nisi catamenia suppressa, vel abdominis glandulae, schirris novis infestae, ortum his affectibus dederint, tanta medicamenta usui esse posse non videntur: multa autem cautela opus est, ne schirri abdominis, longo jam tempore grandiores facti, et solvi nescii, in caneros pessimi moris inde abeant.

Huic denique intentioni prospiciunt aquae minerales resolvendi atque etiam adstringendi viribus a chalybe donatae; Pyramontenses scil. vel Tunbridgenses: ut et Bathonienses vel Moffatenses, tam sulphure, quam chalybe, ditatae.

III. AFFECTUUM horum symptomata graviora pacaturo, inquietudo et vigiliae, quibus misere torquentur aegri, primo occurrunt: hæc autem diuturno usu invalescentia, nisi opio solo, vel tinctura hujus, cui guttulae quaedam spirituum aromaticorum vel volatilium, spiritus nimirum salin. aromat. vel C. C. ne sanguinis motus nimium obtorpeat, instillantur, ex voto sedari, vel leniri, non possunt. Opio tamen usque assuescere, haud minus damni, quam spirituum ardentium usus immodicus, his aegris apportat: levioribus itaque vigiliis gummi foetida rectius succurrunt, ut et corpus, pro ratione virium, interdum exercitatum, unde somni lenes, placidi, hominisque naturae maxime convenientes.

Tristes animi affectus ab humorum, uti videtur, motu tardiori, et corporis totius gravitate, pendentes, vino aliisque calidis remediis, cardiacis dictis, levare excitarique solent; horum tamen viribus cito pereuntibus, malum saepius ingravescit: adeo ut languoribus summis urgentibus, et pro tempore solum, cum usus horum perpetuus esse nequit, propinanda sint ista
reme-

remedia. Quae vero ad morbum funditus tollendum porriguntur, hic etiam magis quadrant.

Vomitum, aut diarrhoeam enormem, a spasms ut plurimum ortum, opio, prudenter exhibito, compescere aequum est. Salivae autem tenuis fluxus uberior, quem vomendi desiderium comitatur, emetico, ex mente Cheynei, sistendus est.

Paroxysmus hystericus gravissimum hujus morbi symptoma merito censetur. Eo itaque accedente, omnia artis molimina in subsidium vocanda sunt. Quae foeminae corporis habitu sanguineo utuntur, iis detrahi debet sanguis. Medicamenta dein contra spasmos valentia, spiritus scil. volatiles, sal. ammoniac. C. C.; julapia et enemata cum gummi foetidis parata; tinctura fuliginis; castoreum, &c. exhibenda sunt. Quaecunque enim gravem tetrumque odorem spirant, sive intra corpus sumpta, sive naribus admota sint, paroxysmis hisce tollendis aut leniendis apprime inserviunt. Tinctura cantharidum nonnullis pro specifico est; dysuria vero, hujus usui superveniens, malum auget. Sopor altus, veterni vel apoplexiae speciem prae se ferens, exigit, ut corpus extimuletur humorumque revulsio fiat, vel scil. ope emplastri vesicatorii vel cucurbitae nuchae applicatae. Sternutamentum etiam, pulvere foliorum asari naribus ingesto, cieri debet: “Mulieri enim, uteri strangulatu vexatae, sternutationem succedentem bono esse,” Hippocrati^a olim animadversum est. Quae denique foetent omnia hic etiam locum habent. Corporis extremorum fricatio, ea praesertim quae fit pannis laneis, quibus gummi benzoin vel thuris fumi excipiuntur, utilis est.

Ad spasmos sopiendos emplastrum antihystericum ventris regioni

^a Aph. 35. sect. 5.

gioni, ut et plantis pedum frigescentibus, summo cum fructu quandoque admovetur.

IV. MEDICAMENTORUM, quae, cum prudentia et consilio adhibita, corporis vires firmant, amplissima quidem sylva est. Haec ergo, ordinis et compendii causa, ad classes quasdam, a lenioribus ad fortiora progressuro, mihi liceat revocare.

1^{mo}, Ostreorum testae, oculi cancrorum, creta, alique pulveres, absorbentes dicti, dum, succos acidos et inutiles ad se attrahendo, vasa corporis firmant, huic proposito respondent.

2^{do}, Vegetabilia amara; centaurium minus, carduus benedictus, ruta, (multum Boerhaavio laudata) flores chamaemel. rad. gentian. galang. major. calam. aromatic. cortex aurantiorum, &c. Aromatica; cortex winteran. cinamom. macis, nuxmoschat. rad. valerian. sylvestr. (Cheyneio plurimi facta) gummi benzoin, camphor. &c. Alcalescentia, acria; nasturtia, cochlear. hortens. Rad. allii, raphan. rustican. sem. sinap. &c. Acido-austera, adstringentia dicta; cortex querc. granator. rad. tormentill. bistort. &c. Plantis quippe, amaris, aromaticis et acribus, vasa corporis excitandi, humorumque motus promovendi, non eadem, neque diversa tamen multum, vis inest: vegetabilia autem acido-austera fibrarum elementorum compingendi virtutem habent; horum vero usus nimius sanguinem cogit.

3^{tio}, Cortex Peruvianus, chalybs et balnei frigidi usus, reliquis fere omnibus remediis palmam praeripiunt; nihil enim vires aegrorum fatiscentes potentius his suscitatur et refocillat.

Omnia autem haec medicamina, tempore alieno data, vires adeo non intendunt, ut frangant quam maxime et imminuant. AEgris itaque admodum infirmis, quibusque viscera mala ta-

be infici jam coeperint, quae leniter astringunt, parca refractaque dosi, medicus cautus prudensque exhibet. Remedia enim forti stimulo astringentia, praesertim acido-austera, humores cogunt, inflammationem febremque excitare, ut et ora vasorum, in ventriculum et intestinorum tubum hiantium, occludere possunt.

Ferri usus aegros debiles, atque acidis ventriculi laborantes, juvat; nocet vero calidis et biliosis. Inde autem ferri assummentibus prodesse novimus, si ructus, alii instar, faetentes, vel et ovorum rancidorum, pariantur, alvique faeces fere nigrescant: haec enim acida inquilina a ferro subigi ostendunt; unde calor, prius deficiens, corpori innascitur.

Ferri limati pulvis, testibus Sydenhamo, Boerhaavio et Hoffmanno, omnibus medicamentis, ab arte chemica inde paratis, longe praestat; sal vero martis laus non exigua merito tribuitur. Sydenhamus chalybis usui remedia cathartica, quae vires corporis plus minus labefactant, interponi debere negat: Quod si perturbationes magnas tum animi, tum corporis, chalybeata inducunt, horum usum non statim omitti, laudanum vero, aqua aliqua hysterica mistum, singulis noctibus propinari suadet. Merito quidem ut plurimum, in curatione horum affectuum, repudiantur purgantia; alvus tamen diu adstricta, ventriculi inflatio et intestinorum tormina, haec eadem exhiberi quandoque jubent.

Haud raro morbus hicce semel curatus revertit: eo itaque depulso, hoc solum negotii medico datur, ut aegros, jam convalescentes, exercitiis et diaeta antea laudatis, quo minus recidivae opportuni sint, uti moneat.

F I N I S.